

## REFVTATION

D'VN LIBELLE DIF-

FAMATOIRE INTITVLE

*l'Auarice des Iesuites.*

Opuscule consacré à la memoire  
 du bien-heureux P. XAVIER,  
 de nouveau beatifié par no-  
 stre saint Pere le Pape.



A PARIS,

Chez PIERRE LOVYS FE-  
 VRIER, au mont S. Hi-  
 laire, à la Iustice.

---

 M. DC. XX.
*Avec permission.*



Case

F

39

326

1620px







REFVTATION  
D'VN LIBELLE DIF-  
FAMATOIRE INTITVLE  
*l'Auarice des Iesuites.*

Opusculé consacré à la memoire  
du bien-heureux P. XAVIER,  
de nouueau beatifié par no-  
stre saint Pere le Pape,



E consacré à la memoi-  
re du bien-heureux Pe-  
re Xauier (dont l'Eglise  
vient de solemniser la nouuelle  
beatification) la desfaiçte d'un  
insigne calomniateur ennemy  
de sa compagnie. Puis que ce  
grand saint, second Apostre  
des Indes a porté l'Euangile  
aux peuples les plus barbares,  
ce n'est pas la raison que l'enuie



& la mesdisance replante la barbarie parmy nous. Puis que Dieu a inspiré le chef visible de son Eglise militate de tirer cette lumiere de deffoubs le boisseau suyuant le commandemēt de IESVS-CHRIST, afin qu'elle reluise en edification à son Eglise, ne souffrons pas que Satā ialoux de la gloire des Saints esbranle le chandelier, (s'entēd la religieuse & docte societé) en laquelle ce grand Sainct reluit. Les vrais Catholiques confessent qu'il a meritē par son zele & sa constance à prescher la Foy, que Dieu suyuant sa promesse le fit vne des plus precieuses colonnes de son Eglise: C'est pourquoy en toute deuotion i'y veux appendre ses trophées, que ie remporte sur l'enuieux accusateur de ses fre-



res & compagnons à procurer  
l'aduencement de la gloire de  
Dieu.

Celuy dont est question, est  
vn autheur incogneu qui a pu-  
blié vn libelle iniurieux portant  
ce tiltre detestable *l'Auarice des  
Iesuites*. Le corps du discours  
n'est autre chose qu'une exhor-  
tation addressée à ces Messieurs  
contre l'auarice qu'il leur impu-  
te de gayeté de cœur, sans en  
produire non pas vn argu-  
ment, non pas mesme vne sim-  
ple coniecture. Parlons du til-  
tre, qu'est ce autre chose qu'une  
demonstration de l'effronterie  
du temps ou chacun dist &  
escrit ce que bon luy semble  
au preiudice de qui que ce soit.  
Mais par quelle loy ou coustu-  
me, Chrestienne, ou ciuile, est-  
il loisible de calomnier soit vn



particulier, soit vn Corps, nō-  
 mémēt vn Corps Religieux? &  
 qui pis est de le nōmer en l'in-  
 titulation d'un escrit diffama-  
 toire, & le debiter au publicq?  
 O temps! ô mœurs! Que cela se  
 face dans Paris capitale ville du  
 Royaume où est le throsne de  
 nos Roys, où est le propre chāp  
 des fleurs de liz, où est le pre-  
 mier siege de la iustice: Il faut  
 biē aduoüer que Platō est veri-  
 table, quand il dict que l'impu-  
 nité est mere de l'impudence. Il  
 faut bien dire que l'auteur de  
 ce libelle ne craint ny Dieu, ny  
 les hommes; car s'il eust eu quel-  
 que crainte de Dieu, eust il pû  
 offencer cette compagnie qui  
 s'applique iour & nuict à l'in-  
 struction de la ieunesse, à la pre-  
 dication de la parole de Dieu, à  
 l'administration des Sacremēs:



en quoy elle est esgalement importante aux Catholiques , & redoutable aux heretiques. Et s'il eust porté quelque respect aux hommes, n'eut il pas craint d'offencer messieurs les Prelats, & de complaire aux Ministres? ou bien n'eust il pas eu peur d'irriter les Magistrats? à tout le moins n'eut il pas mieux couvert sa passion, quand ce n'eut esté sinõ pour l'amour du Roy qui a choisi le P. Arnoulx de cete Compagnie pour son pre-dicateur & confesseur, à cause des eminentes qualitez de pieté, de zele, & de doctrine qui sont en luy?

Venons au contenu du libelle. Il represente à Messieurs les Iesuites que l'Escriture & les Saints Peres deffendēt des'ad-donner à l'avarice: c'est là le som-



maire de tout le discours. A quel propos cela , deuant que les en conuaincre? Dequoy seruent des remonstrances à qui n'en a pas besoin? Suyuant cete façon de proceder on pourroit exhorter l'autheur de ce libelle à ne point faire la faulse monnoye, à n'estre point concussionnaire, à quitter la compagnie des coupeurs de bourse, à n'estre plus porteur de poulets. A ce compte on auroit droict de luy remonstrer qu'il importe de quitter les bois & les voleries, que les gibets menacent les faulx faulniers: que les parricides sont rompus sur la rouë: que les Preuosts apres courent les assassins; & que le feu est la peine des athees: bref on pourroit luy alleguer beaucoup de telles remonstrances; car il n'y a  
forte



sorte de peché pour execrable  
 qu'il soit, sur lequel la Theolo-  
 gie, la Philosophie, & la Rhetor-  
 rique n'ayent de grandes prises:  
 par apres il n'y a point d'homme  
 si bien viuant, que par benefice  
 d'imputation on ne puisse ex-  
 horter de viue voix, ou par es-  
 crit à s'en corriger. Que si l'au-  
 theur & ses associez respondent  
 que Dieu mercy ils n'ont point  
 affaire de ses instructions, qu'ils  
 attēdent aussi la pareille, & qu'ils  
 se souuiēnent que la plus inique  
 accusation du monde se refuse  
 d'elle mesme toutes & quantes  
 fois qu'elle ne consiste qu'en  
 l'impudence d'imposer.

L'auarice des Iesuites ? Sur  
 quoy est fōdee cette accusatiō?  
 qu'est-ce qu'ils ont tant amassé?  
 De quelque costé qu'on les cō-  
 sidere, on n'y void que les mar-



ques d'une honneste pauvreté. Leur habit est le plus simple qui soit en l'Eglise: leur viure cōpassé selon la pure exigence de la nourriture nécessaire à des Religieux destinez aux lettres: les bastimens de la pluspart de leurs maisons professes, residences, & colleges, ressemblent plustost à vne maison priuée, qu'à vn logement de communauté: Leurs chābres estroittes, sans cheminees, & seulement affectees à la commodité d'un oratoire, d'une table d'estude, & d'un meschant liēt ietté sur des treteaux, sans rideaux ny garniture. Leur reuenu ne monte pas le tout bien deduiēt à cent liures pour l'entretienement de chaque particulier, qui est biē le moins que le plus miserable seruiteur d'un artifā couste à son maistre: & en effect ils ne sçau-



roient subsister sans l'exacte menagerie dont ils vsent, accompagnée de la benediction que Dieu verse sur ses seruiteurs: & neantmoins avec cete modicité de moyēs il faut assister les malades, ce qu'ils font avec vne charité incroyable. Il ne faut pas manquer au debuoir d'hospitalité enuers leurs confreres, qui vont & viennent: faut auoir vne bibliotheque, dequoy ils ne sçauroyēt se passer, & fournir la lumiere, & les ornements à l'autel, qu'ils seruent avec vne proprieté & splendeur si exemplaire, qu'estant comparee à leur peu de fonds, il y a plus d'apparence de les accuser de prodigalité que d'auarice.

Adioustez à l'euidence & à la force de cete iustification, quebiē que ces messieurs rendent plus de seruice dans Paris qu'en nulle au-



tre ville du Royaume, & qu'ils y  
 soyent honorez d'une speciale fa-  
 veur du Roy, de l'amitié des prin-  
 ces & des grands; & qu'on les  
 croit estre, comme ils sont  
 en effect des plus beaux esprits du  
 siecle, & gens propres à mesnager  
 les fauorables occasions: cepen-  
 dant il n'y a Religion dans Paris  
 qui ne soit mieux bastie que la  
 leur. Voila la maison de S. Louys,  
 qui en l'espace de cinquante ans  
 n'a peu auoir vne petite Eglise;  
 quoy que les Capucins en ayent  
 eu deux, & que les Carmelines,  
 Capucines, Feuillants, Recolets,  
 Religieux du tiers ordre, Car-  
 mes reformez, &c. ayēt accumu-  
 lé des aumosnes ou autres bien-  
 faiçts tant du peuple, que de per-  
 sonnes particulieres de quoy faire  
 les bastimés des eglises & des mo-  
 nasteres qu'ils y ont aujourd'huy,



Supposons que les Iesuites y fussent aussi bien accômodez, pourtant il ne s'ensuyuroit pas qu'ils soyent auares. Tout au contraire saint Paul dict pour eux: Si nous vous auons semé les choses spirituelles, est-ce si grand cas que nous recueillions les vostres temporelles?

Où sont doncq ces grâds thresors? où sont ces amas imaginaires qu'on leur impute? D'où viét que l'ennemy de ces Messieurs ne remarque point en eux vn traict du vice qu'il les exhorte à quitter?

Au demeurant cet artifice est tres-pernicieux; car exhorter à la hayne & correctiô d'un vice, sans prealablement auoir monstté qu'on en est taché, c'est d'une part l'attribuer à qui ne l'a pas, puis qu'o prié d'y renoncer; & de l'autre c'est ôster tout moyen de se



defendre à cause qu'il n'y a rien d'expres & de special en cette malicieuse & muette accusation: c'est pourquoy il n'y a rien de si dangereux que ces charitez superflües, ny qui merite de plus feuerie punition.

Or, il y a deux poincts remarquables en ce libelle, l'un est la malice dont on tasche à rendre odieux les Iesuites: l'autre qu'au deffaut de moyens legitimes on se sert d'une doctrine specieuse d'abord, & neantmoins heretique, & brullable s'il en fut iamais. La malice est cachée sous ce mot d'Auarice, qui contiët en soy toute sorte d'abomination. Aristote nous apprend que celuy qui est entaché d'avarice, s'efforcera de remporter du lucre au prix de quelque crime que ce soit. Le Philosophe

*Arist. in  
Ethic.*

*Iuuenal.  
Ex omni cri  
mine lucrū.*



Bion appelle l'avarice, *omnis improbitatis metropolim*: la ville capitale où sejourneront tous les vices. Le philosophe Timon dict que l'ambition & l'avarice sont les elemēs de tous les maux. L'Apostre S. Paul dict *Que la cupidité d'avoir est la racine de tous maux*. Le mesme Apostre l'appelle *servitude des idoles*. Ce que S. Hierosme prend à la lettre de l'idole Mamon qui est le Dieu des auares. S. Augustin fondé sur l'Escriture compare l'Auare à l'Enfer, qui est insatiable. Sainct Gregoire le grand dict que l'avarice (comme chaque demon se loge dans quelque vice) est *l'habitation de tous les diables*. Sainct Ambroise la nōme la source & l'amorce de toutes sortes de pechez. l'eusse plustost faict de dire que l'Ecclesiastique affirme qu'elle excède tout peché. *Avaro* (dict-

*Vide Laet.*

*in vit. philo.*

*Hieron. in epistol. ad Hell.*

*Aug. sermo. de temp.*

*Gregor. in Moral.*

*Ambros. in epist. ad*

*Qu'il n'y a rien de si*



meschâz que  
l'avarice.

il) *nihil est scelestius*. C'est donc en quoy les ennemys des Iesuites sont tres malicieux, de publier faullement qu'ils s'y addonnent, parce que si cete calomnie venoit à estre receuë, elle les chargeroit à la fois de mille & mille enormitez.

Par dessus la malice d'un si detestable desseing, la faulseté n'est elle pas plus estrange d'imputer le vice d'avarice à ceux qui bië loing d'acquérir ce qu'ils n'auoyent pas, ont quitté ce qu'ils auoyent pour l'honneur de Dieu, & le seruice du prochain? A ceux (dy-ie) qui nuiët & iour enseignët aux Escholes, preschët aux chaires avec l'obseruatiõ de cete liberalité Apostolique. *Qua gratis accepistis, gratis date: Donnez gratuitement ce que vous receuez de mesme.* Cepẽdãt ce sont là les deux plus grãdes liberalitez



liberalitez dont on puisse vser.

Celuy-là (disoit vn saint Pere) a Hieron. ad Rustic.

donné tout ce qui se peut, qui a

tout quitté pour l'Euangile. Et S.

Laurens Iustinian ce tant saint

Patriarche de Venise, parlant de Laurenti, Iustin. in tract. vna solit.

la vie religieuse, *Vbi*, dict-il, *quæ so*

*melius quàm ibi misericordiæ ope*

*ra, visitando ægrotos, docēdo inscios,*

*&c.* Où est-ce que la charité est plus

liberale que là où on secourt les

infirmes, on enseigne les ignorans?

Quelqu'un possible repartira

que la liberalité ne gist qu'à

donner force escus, &c. Mais à

Dieu ne plaise qu'un payen fust

plus religieux que ne seroit vn

Chrestien qui opineroit ainsi. *Non* Cic. 2. Offic.

*est dubium quin illa benignitas quæ*

*constat ex opera & industria, & ho*

*nestior sit, & latiùs pateat, & possit*

*prodesse pluribus.* Il n'y a point de

doubte que la liberalité qui gist à



*S. Ambroise* contribuer son seruice, & communiquer son industrie, ne soit plus honnesté, ne s'espande dauantage, & n'assiste beaucoup plus de personnes. Verité qui demontre cet imposteur icy, attendu que le public est tesmoing que les Iesuites par la seule eleuation de la ieunesse donnent de vrais Chrestiens à l'Eglise, des sçauans aduersaires aux heretiques, des hommes trescapables au Clergé, de dignes Prelats aux Eueschez, des Iuges aux Iudicatures, de bons citoyens aux villes, quantité de bons esprits à diuerses religions, sans comprendre le bien qu'ils font tant aux plus fameuses chaires qu'ils possèdent, qu'en la Confession, au Sacrement de Penitence, où la pieté & la capacité sont extremement necessaires.

Que s'il faut passer plus outre,



il se trouuera que par tout où ils sont, chaque annee ils enrichisēt les villes de la valeur de dix fois plus qu'ils n'en reçoient de commoditez, à cause de l'affluēce des escholiers qui y accourent, & qu'en chaque lieu ils donnent à gagner à vne infinité d'artisans & de manœuvres, qui sans eux ne seroyent pas employez : Et apres l'impudence osera publier calomnieusement l'auarice des Iesuites?

Le second poinct est vne notable heresie qui butte contre les Religieux rentez, & contre les biens du Clergé: car il dogmatise tacitement que les Religieux ne deburoyent point auoir de bien en commun, & à cete fin il blasme les Religieux du monastere S. Michel basty par l'Empereur Comnenus, d'auoir dict qu'ils



pouuoient auoir du bien en commun. Et ailleurs il reproche à l'Eglise ses ornemens & ses bastimens consacrez à la louange de Dieu ; c'est le style des anciens heretiques appelez *Apostolici* par S. Epiphane & S. Augustin, qui enseignoiēt q l'Eglise ne deuoit auoir non plus de biē qu'en auoyēt les Apollres. Ce sont les maximes des Audeans raportez par Epiphane & Damascene, qui reprochoyent aux Euesques leurs richesses , c'est la moderne theologie des Vaudois & des Albigeois mentionnés par *Æneas Syluius* & S. Antonin, qui detractoit du tēporel de l'Eglise : c'est la Triologie de Vuiclef qui

*Triol. p. 4.* escript que les Princes sur peine  
*Vuiclef. in* de damnation doiuent despouiller l'Eglise de son reuenu. A leur imitation celuy-cy voudroit que



le vœu de pauureté ne se peult accomplir qu'à conditiō de mourir de faim, iustement à l'opposite de la doctrine de Iesus-Christ, qui non content de promettre la vie eternelle à ceux qui luy voüēt vn entier delaissement de tout, y adiouste le centuple en ce monde: il voudroit que le mespris du monde fust vne extrefme disette de tout; il se fasche, ou plustost l'esprit malin en luy, de voir que la promesse de Iesus-Christ resfort à son plain effect en l'ordre des Iesuites, aussibien qu'aux autres; il creue de despit, pourceque la pauureté volontaire est suiuite de benedictions, il enrage de ce que les Roys sont nourriicers de l'Eglise, comme il auoit esté predict: *Et erūt Reges nutricij tui, &c.* Celuy est vn tourment insupportable de veoir que l'or del'egypte



fert au tabernacle, de ce que les autels sont illustremēt parés, de ce que Dieu est adoré, & ses Saints inuocqués d'une façon honorable, & esclatante, avec beaucoup de maiesté. A tout le moins si cet escriuain qui fait tant du Catholique zelé, trouuoit bon qu'un Iesuite eust autant de reuenue qu'en a vn Surueillant, ou Ministre: que nos Euesques & le Pape ne fussēt pas de pire cōditiō que les Euesques d'Angleterre, & mōsieur l'Archeuesque de Cantourbery qui a les moyens & le train d'un petit Monarque, il auroit mieux couuert son venin. Pour conclusion, il a trop de zele & trop peu de sçauoir, veu qu'il tombe au danger dont il feint de vouloir retirer autrui. Il dict auoir escrit ce beau sermō, pour ce qu'il est bon de retirer des flā-



mes le prochain , & le miserable  
 qu'il est ne voit pas qu'il les jette  
 par la bouche. L'Apocalypse com-  
 pare la faulſe doctrine au feu qui  
 met tout en combustion: Le feu,  
 dict-elle, ſortoit de leur bouche  
 (lors qu'elle parle des heretiques)  
 Salomon nous aſſeure que la pa-  
 rolle de l'impie eſt vn feu deuor-  
 rant: c'eſt pourquoy il fera mieux  
 à l'aduenir d'y prendre garde, &  
 au lieu d'inquieter les ſainctes  
 ames, il ſe monſtrera bien plus ad-  
 uisé d'en implorer les prieres, afin  
 qu'il ſe puiſſe ſauuer ſur les eaux  
 de la penitence, pour eſteindre le  
 feu de ſon animoſité & de ſa hay-  
 ne contre la religion , ou plu-  
 ſtoſt d'eſteindre le feu d'enfer qui  
 inſenſiblement le ſaiſit.

F I N.



